

1 योहान

योहान रासता मोदाटा सिट्टि

इद सिट्टिटा बारेमते गिचचो परिचयम
 रासतोना पोरोलः योहान
 रासता कालमः इसवि सन 85-95
 येसुना वरोर प्रेरित योहान इद सिट्टि विस्वासुल्कुनाहाटी रासतोर. अदुनहाटी
 ओर येसुनतोन मत्तास्केटा ओना अनुबवमतुन इद सिट्टिते रासि वेहतोर.

येसु किरिस्तु पुरागा पेन आनि पुरागा मनकलगुडा आंदुर. ओनापोर्रो विस्वासम
 इरतेने, मना पापालक मापि आसि मनाकु बस्केळक पिस्साना पिस्वर दोर्कता.
 पडाना रीति-रिवाज्कुन पीसि मनम ताका पर्रोम, इंचि अवुनाहेंदाल मनाकु
 बस्केळक पिस्साना पिस्वर दोर्का पर्रो.

बोर अय्ते किरिस्तुनपोर्रो विस्वासम कीतुर, ओर अंतोर वरोंक-वरोर पावरम
 कीसेके बेस कलियसि मंदना, अर्तम हिल्लुवा नियमाल्कुन होळसिसि किरिस्तु
 हुपिस्ता हरदेन ताकाना. इस्रोटा पोल्लें इद सिट्टिते योहान रासतोर.

बगा बतल मंता

जोहार आनि परिचयम 1:1-4

वेल्लु आनि हीकटा 1:5-2:29

पेनदा पिलाल्क आनि देय्यमता पिलाल्क 3:1-24

सत्तेम आनि आबद्दम 4:1-6

पावरमता कबळ बतल 4:7-21

गेल्लसना विस्वासम 5:1-21

पिस्वर हिय्यना पोल्ले

1 मोट्टा मोदोलताल बोर अय्ते मत्तोर, ओना बारेमते मोमोट मीकु वेहचंतोम.
 ओन मोमोट केंजतोम, ओन मावा कळकुने हळतोम, मंचिगा हळसि मावा कय्कुने
 ओन इट्रोम. पिस्वर हिय्यना पोल्ले ओर्रे आंदुर.

2 आ बस्केळक पिस्साना पिस्वर हिय्यना पोल्ले मोदाला पेनबाबानतोन मत्तोर.
 ओन पेन मनकाना रूपमते मारियागोटसि बूमिते लोहताहेंका मोमोट ओन हळतोम,

इंचि गवाइ वेहांतोम. अल्हेने आ बस्केळक पिस्साना पिस्वरता बारेमता कबुर मीकु वेहांतोम.

3 मोमोट अय्ते पेनबाबानतोनि ओना मर्रि येसु किरिस्तुनतोनि कलियसि उंदासि पिस्सेक मंतोम, अदुनहाटी मोमोट बतल अय्ते ह्ळतोम, केंजतोम, अदुना बारेमते मीकुगुडा वेहासेक मंतोम. दीनहेंदाल मिमेटगुडा मातोनि कलियसि मनम उंदासि मंदकोम.

4 मिमेट मातोनि कलियसि मावा आनंदम पुरागा आयाना इंचि मोमोट इव पोल्लें मीकु रासेक मंतोम.

पेन वेलगु आंद

5 येसुनाहेंदाल मोमोट बद कबुर अय्ते केंजतोमो, अदे कबुर मीकु वेहांतोम. अद बतल इत्ते, पेन वेलगु आंद, दानागा गिचचोगुडा हीकट हिल्ले.

6 ओक्कला मनम पेनतोनि कलियसि मंतोम इंचि वेहचि, हीकटते ताकानय्ते मनम आबद्दम वळ्ळंतोम, सत्तेमते ताकसेक हिल्लोम.

7 गानि पेन बल्हा वेलगुने मंता, अल्हा मनमगुडा वेलगुने ताकानय्ते, मनम वरोनतोनि वरोर कलियसि उंदासि मत्ताप मनंतोम. अस्के पेनदा मर्रि येसुना नेत्तुर, मनाकुन मना अन्नि पापाल्कुनाल पुरागा बेस साप कीता.

8 ओक्कला मनमगिंटा, महगा बदे पापम हिल्ले इंचि वेहकुनानय्ते, मनद मनमे पसांचकुंचंतोम, मनालोप्पो सत्तेम हिल्ले.

9 गानि पेन नीति आनि विस्वासमगल्लद आंद. अदुनहाटी ओक्कला मनम मना पापाल्कुन दाना मुन्ने ओपकुनानय्ते, अद मना पापाल्कुन मापि कीसि, मनाकुन मना अन्नि तप्पुड कबाह्कुनाल बेस साप कीता.☆

10 ओक्कला, “मोमोट पापम किया हिल्लोम” इंचि मनम इनानय्ते, मनम पेनदुन आबद्दम हिळ्ळ अरहंतोम. दाना पोल्ले मनालोप्पो हिल्ले.

2

येसु मना दंटातोर आंदुर

1 नावा पिलाल्कुनिटा! मिमेट पापम कियामन्नि इंचि नना इव पोल्लें मीकु रासेक मंतन. गानि ओक्कला बोरन्ना पापम कियानय्ते, मनाहेंदाल पेनबाबानतोनि

वळ्कालय ओनगा वरोर सहायम कियानोर मंतोर, ओरे नीतिमंतुड येसु किरिस्तु आंदुर.

2 मना पापाल्क मापि आयाना इंचि ओर मनाहाटी मोक्कु आतोर. ओर सिराप मना पापाल्क मापि आयानाहाटीगे आयो, पूरा दुनियातोर पापाल्क मापि आयानाहाटी मोक्कु आतोर.

3 मनम ओक्कला ओना आदेसकुन पीसि ताकानय्ते, ओन मनम बेस तेल्पिचकुत्तोम इंचि मनाकु बरोबर तेळियंता.

4 बोर अय्ते, “नना पेनदुन तेल्पिचकुत्तन,” इंचि इंतोर, गानि दाना आदेसकुन पीसि ताकोर ओर पोंगुळ आंदुर. ओनगा सत्तेम हिल्ले.

5 गानि बोर अय्ते पेनदा पोल्लेतुन पीसि ताकंतोर, ओनगा पेनदा पावरम निजमे पुरागा आता. दीनहेंदाले, मनम वरोनतोनि वरोर कलियसि उंदासि मंतोम इत्तद तेळियसि दांता.

6 बोर अय्ते, “नना पेनतोनि कलियसि पिस्सेक मंतन,” इंचि वेहतोरो, ओर कुद्दु किरिस्तु पिसतसोंटा पिस्वर पिसागोम.

पूना तरिकाते पडाना आदेस

7 नावा पावरमगल्लोरिता! नना इंदके मीकु पूना आदेस रासेक हिल्लेन, मोदोटाल मीकु तेळियसि मत्ता पडाना आदेसे आंदुर.

8 अयना नना उंदि पूना आदेसतुन मीकु रासेक मंतन. इद किरिस्तुना लोप्पो, मीलोप्पो सत्तेमते मंता. बारित्ते हीकट माय्सि होनालय आसंता, सत्तेमता वेलगु अय्ते मेसेकिन मंता.

9 बोर अय्ते, “नना वेलगुने मंतन,” इंचि वेहकुंचि, ओना दंटा विस्वासिन हय्सोर, ओर इंकागुडा हीकटतेन मंतोर.

10 बोर अय्ते ओना दादन पावरम कीतोर, ओर वेलगुने निल्सि मनंतोर. ओनगा पापमते अर्ना लायकतद बदे पोल्ले हिल्ले.

11 गानि बोर अय्ते ओना दादन हय्सोर, ओर हीकटते मंतोर. हीकटतेन पिस्सेक मंतोर. हीकटहाटी ओना कळ्ळु दिस्साकोंटा आताहाटी, ओर बेके होंचंतोरो ओनद ओन्के तेळियो.

12 नावा पिलाळ्कुनिटा! किरिस्तुना पोरोलतेन मीकु मीवा पापाल्कुना मापि दोर्कुता. अदुनहाटीगे नना मीकु इव पोल्लें रासेक मंतन.

13 बाबोरिता! मोट्टा मोदोल्लाल मत्तोन मिमेट तेल्लिचकुत्तिर, इंचि नना मीकु रासेक मंतन. लेय्युरिता! मिमेट सेड्डातनमतुन* गेल्सतिर, इंचि नना मीकु रासेक मंतन. पिलाल्कुनिटा! मिमेट पेनबाबान तेल्लिचकुत्तिर इंचि नना मीकु रासेक मंतन.

14 बाबोरिता! मोट्टा मोदोल्लाल मत्तोन मिमेट तेल्लिचकुत्तिर, इंचि नना मीकु रासेक मंतन. लेय्युरिता! मिमेट गट्टिपळतिर. पेनदा पोल्ले मीलोप्पो निल्लिस मनंता. मिमेट सेड्डातनमतुन गेल्सतिर, इंचि नना मीकु रासेक मंतन.

15 दुनियातुन आयि दुनियाते मनना वस्तुकुन आयि पावरम कियमट.† ओक्कला बोरन्नागिंटा दुनियातुन पावरम कियानय्ते, ओनगा पेनबाबाना पावरम हिल्ले.

16 बारित्ते दुनियाते मननव इत्ते, मेंदुल्ला इच्चा, कळ्ळुकुना इच्चा आनि पिस्वरता गरी इव पेनबाबानगटाल वातव आयों. इव ई दुनियातवे आंदुं.

17 ई दुनिया, दुनियाताल वाता इच्चां, इव रोंडगुडा माय्सि होनानुं, गानि बोर अय्ते पेनदा पोल्लेपोरी ताकंतोरो, ओर मात्रम बस्केळ्ळक पिस्सि मनानुर.

किरिस्तुना पगातोर

18 पिलाल्कुनिटा! इद आकिरता वेला आंद, किरिस्तुना पगातोर वायानुर इंचि मिमेट केंजसि मत्तिर. अल्हेने इंदके किरिस्तुना वेल्लेटोरे पगातोर वातुर. इदुनहेंदाल, इद आकिरता वेला आंद इंचि मनाकु तेळियंता.

19 ओर लोकुल्लक मना लोप्पोटाले पेय्सतुर, गानि ओर मनोर्क आयुर. ओर निजमे मनोर्क आसि मत्ते मनातोनि मंचि मन्नेर. ओर बोरे मनोर्क आयुर इंचि मनाकु तेळियानाहाटीं ओर अल्हा पेय्सि होत्तुर.

20 गानि मीवद अय्ते पवित्र मत्तोनहेंदाल अबिसेकम आता, अदुनहाटीं मिमेट अंतोर सत्तेमतुन एरपाट कीतिर.

21 मीकु सत्तेम तेळियो इंचि नना मीकु रासा हिल्लेन. मीकु सत्तेम एरपाटे मंता, इंका सत्तेमताहेंदाल बद्दे आबद्दम पोल्ले वायो इंचिगुडा मीकु तेळियसे मंता. अदुनहाटीं नना मीकु रासतन.

* **2:13** सेड्डातनमतुन देय्यमतुन. † **2:15** दुनियातुन आयि दुनियाते मनना वस्तुकुन आयि पावरम कियमट दीना अर्तम बतल इत्ते, इद दुनियाताहेंदाल दोर्कना सुकम, दिस्तदुनना हळसि आसे पडमळ, दुनियाते सुकम हिथ्याना वस्तुनाहाटीगे तन्लाडमळ. इसोंटा पोल्लेन पावरम कियाना मनकल पेनदुन पावरम किय्योर इत्ताप.

22 बोर अय्ते, येसुन “किरिस्तु” इंचि ओप्कुन्नोरो, ओर असल आबद्दम वळ्कानोर आंदुर. ओरे किरिस्तुना पगातोर आंदुर. ओर बाबन, मर्रिन ओप्कुन्नोर.

23 बोर अय्ते मर्रिन ओप्कुन्नोर, ओर बाबोनगुडा ओप्कुन्नोर. मर्रिन ओप्कुनानोर बाबोनगुडा ओप्कुंतोर.

24 मोदोलताल मिमेट बतल अय्ते केंजतिरो, अदुन मीलोप्पो बस्केळ्ताहाटी ईर्राट. अल्हा ईर्रांनय्ते, मिमेट मर्रि आनि बाबोनतोनि उंदासि मंदकिट.

25 किरिस्तु मनाकु बस्केळ्क पिस्सना पिस्वर हीतन इंचि पोल्ले हीतोर, अद इदे आंद.

26 मीकुन पसांचालय हळना लोकल्कुना बारेमते नना इव पोल्लें मीकु रासेक मंतन.

27 गानि बदनतोनि अय्ते मीवा अबिसेकम आता, अद मीलोप्पो निल्सि मनंता. अदुनहाटी बोर मीकु कराहना अवसरम हिल्ले. मीलोप्पो मनना अबिसेकम, मीकु अन्निटवुना बारेमते कराहंता. अद सत्तेम आंद, दाना कराहमळ आबद्दमतद आयो. अद मीकु बल्हा कराहंता, अल्हा मिमेट किरिस्तुना लोप्पो निल्सि मंटु.

28 अदुनहाटी नावा पिलाल्कुनिटा! मिमेट किरिस्तुने निल्सि मंटु. अल्हा मत्ते, ओर बस्के अय्ते इद बूमिंते मल्सि वायानुर अस्के, मनम वेंरे हिल्वोरम आसि ओर वातंका ओना मुन्ने सिग्गु वायाकौंटा मंदा परकोम.

29 मिमेट ओक्कला किरिस्तु नीतिमंतुड इंचि तेल्लिचकुत्तोर आयानय्ते, सत्तेमता कबळ कियाना हरेक मनकल पेनदाहेंदाले पुट्तोर इंचिगुडा मीकु तेळियंता.

3

मनम पेनदा पिलाल्कुम आंदुम

1 हुळट! पेन मनाकुन बच्चोन वेल्ले पावरम कींता! अदुनहाटी मनाकु पेनदा पिलाल्क इंचि पोरोल दोर्कता, आनि मनम आंदुमगुडा. गानि दुनियातोर पेनदुन एरपाट किय्युवाहेंका ओर मनाकुन तेल्लिचकुन्नुर.

2 नावा पावरमगल्लोरिटा! इंदके मनम पेनदा पिलाल्कुम आंदुम. गानि वायाना कालमते मनम बल्हा बतल मनंतोम इत्तद, इंका तेळिया हिल्ले. अय्नागानि, किरिस्तु मर्रा मल्सि वायानुर अस्के, ओर बल्हा मंतोर अल्हे ओन मनम हळंतोम. अस्के मनमगुडा ओनालेसींगे मनंतोम इंचि माकु एरपाट मंता.

3 किरिस्तुनपोर्रो इसौंटा आसे इराना हरेक मनकल किरिस्तु पवित्र मत्ताप कुद्दुगुडा पवित्र कीकुंतोर.

4 पापम कियाना हरेक मनकल, दर्मसास्त्रमता विरोदमते मनंतोर. दर्मसास्त्रमता विरोदमते ताकमळ इत्तेन पापम आंद.

5 गानि पापालकुन लक्कु कियानाहाटीगे किरिस्तु वातोर इंचि मीकु एरपाटे मंता. ओनगा बतले पापम हिल्ले.

6 बोर अय्ते किरिस्तुना बक्वित्ते निल्सि मनंतुर, ओर पापम कीसेके मन्नुर. गानि बोर अय्ते पापम कीसेके मनांतुर, ओर किरिस्तुन ह्ळा हिल्लुर, ओन एरपाटगुडा किया हिल्लुर.

7 पिलालकुनिटा! मीकुन बोरे पसांचकौंटा जेगर्ता मंडु. बोर अय्ते सत्तेम कबाहक कीतोर, ओर किरिस्तुनलेसीं नीतिमंतुडे आंदुर.

8 पापम कीसेके मनना हरेक मनकल देय्यमता बाजुनोरे आंदुर. बारित्ते सुस्वनाले देय्यम पापम कीसेके वासंता. गानि देय्यमता कबाहकुन नासडेम कियानाहाटीगे पेनदा मर्रि इद दुनियाते वातोर.

9 पेनदा संतानम आतोर बोरे आयिर, ओरा लोप्पो पेनदा गुनम मनंता. अदुनहाटीं ओर पापम किय्युर. ओर पेनदा संतानम आताहाटीं, ओर पापम किय्ये पॅर्र.

10 इदुन पीसे, पेनदा पिलालक बोर आंदुर, देय्यमता पिलालक बोर आंदुर? इत्तद तेळियसि दांता. बोर अय्ते सत्तेमते ताकुर, ओरा दादन पावरम किय्युर, ओर पेनदा संतानम आयुर.

वरौक-वरोर पावरम कियाना

11 मनम वरौक-वरोर पावरम कियागोम इनना ई बोदा, मिमेट सुस्वनेन केंजतद आंद.

12 मनम काइनूनालेसीं मननायो. ओर देय्यमता बाजुनोर आसि ओना तम्मुन हक्कतोर. ओर ओना तम्मुन बद कारनमते हक्कतोर? बारित्ते, ओना तम्मुना कबाहक नीतितव मत्तां आनि ओना कबाहक बोरे तप्पुनव मत्तां.

13 विस्वासुल्कुनिटा! मीकुन दुनियातोर हय्सुर, अस्के मिमेट इचंन्रम आयमट.

14 मनम मना दंटाता विस्वासुल्कुन पावरम कीतोम. अदुनहाटीं मनम हामुरताल पेय्सि पिस्वरते वातोम, इंचि मनाकु एरपाट मंता. बोर अय्ते पावरम किय्योर ओर हातोनेलेसीं मंतोर.

15 बोर अय्ते ओना दादन, तम्मुन हय्सोर, ओर मनकन हक्कानसंतोर आंदुर. मनकन हक्कानोनगा बस्केळ्ळक पिस्सना पिस्वर मन्नो इंचि मीके अय्ते एरपाटे मंता.

16 किरिस्तु मनाहाटी ओना सतता जीवा हीतोर. दीनाहेंदाल, पावरम इत्ते बतल मनाकु तेळियता. अदुनहाटीं मनम मना दंटा विस्वासुल्कुनाहाटीं जीवा हियालय तयार मनगोम.

17 गानि बोनागन्ना वेल्लेन दनम-संपत्ति मंचि, ओना दादांको, तम्मुंको अवसरम मंता इत्तद तेळियसिगुडा ओना जीवा नोय्याकॉटे, ओनगा पेनदा पावरम मंता इंचि बल्हा इनकोम?

18 अदुनहाटीं नावा पिलाल्कुनिटा! मनम मना पावरम सिराप तोळ्दा पोल्लेनेन आयो गानि, सत्तेमते बेसता कबाहक कीसि पावरम हुप्साना.

19 अल्हा कीतेन, मनम सत्तेमता बाजुनोरम इंचि मनाकु एरपाट आंता. अस्के मनम वेरियाकॉटा दैरनेमते पेनदा मुन्ने नित्ता परंतोम.

20 मना मनसु मनापोरों दोसेम दोस्सिनागानि मना मनसुंकन्ना पेन बच्चोनो पेद् देद आंद, दान्क अन्नि तेळियंता.

21 पावरमगल्ला दंटातोरिटा! मना मनसु मनापोरों दोसेम दोस्साकॉटे, पेनदा मुन्ने मनम दैरनेमते मना परंतोम.

22 इंका दाना आदेस परकारम ताकसेके, अद कूस आयाना कबाहक कीसेके मत्ते, मनम बतल तल्किना अद मनाकु हीता.

23 दाना आदेस बतल इत्ते, मनम दाना मरिं येसु किरिस्तुनपोरों विस्वासम इराना आनि ओना आदेस परकारम मनम वरोंक-वरोर पावरम कियाना.

24 बोर अय्ते पेनदा आदेस परकारम ताकंतोर, ओर पेनदा लोप्पो निल्लिस मनंतोर, ओनालोप्पो पेन निल्लिस मनंता. इल्हा, पेन मना पिस्वरते निल्लिस मनंता इंचि, मनाकु हीता पवित्र आत्माहेंदाल, एरपाट आंता.

4

सत्तेमता आत्मा आनि आबद्दमता आत्मा

1 पावरमगल्लोरिटा! नहगा पेनदा आत्मा मंता इनना अंतोरपोरों विस्वासम कियमट. मोमोट पेनदा कबुरतोरम इंचेके, तप्पुड बोदां कराहनोर वेल्लेन मंदि दुनियाते वेलियसंतुर. अदुनहाटीं बरोसा कियाका मुन्ने आ वळ्कानोनगा मनना आत्मां पेनदागटाल वातावेना इंचि, परिक्सा कीसि हुळट.

2 पेनदा आत्मातुन मिमेट इल्हा एरपाट किय्याना; बद आत्मा अय्ते, “येसु किरिस्तु मनकना रूपमते वातोर,” इंचि ओप्कुंता, आ हरेक आत्मा पेनदाहेंदाल वातद आंद.

3 गानि बद आत्मा अय्ते, येसु मनकना रूपमते वातोर इंचि ओप्कुन्नो, अद आत्मा पेनदाहेंदाल वातद आयो. अद किरिस्तुना पगातोना आत्मा आंद. असोंटा आत्मा वायाना मंता इंचि मिमेट मुन्नेन केंजसि मत्तिर, अद इंदके दुनियाते वासि मंता.

4 पिलाल्कुनिटा! मिमेट पेनदा हेंदोर आंदिर. मीलोप्पो मनना आत्मा, दुनियाते मनना आत्माकन्ना बच्चोनो पेद्देद आंद. अदुनहाटीं आ आबद्दम कबुरतोर आत्मान मिमेट गेल्सतिर.

5 आबद्दम कबुरतोर आत्मां दुनियातव आंदुं, अदुनहाटीं अव दुनियाता पोल्लेगे वळ्ळकंतां, दुनियातोर अबुना पोल्लें केंजंतुर.

6 गानि मनम पेनदा लोक्कल आंदुम. पेनदुन एरपाट कियानोर, मना पोल्लें केंजंतुर. गानि पेनदुन एरपाट कियबोर, ओर मना पोल्लें केंजुर. इल्हा मनम, बद सत्तेमता आत्मा आनि बद आबद्दमता आत्मा इंचि परक एरपाट किया परीतोम.

पेन पावरम आंद

7 पावरमगल्लोरिता! पावरम पेनदाहेंदाल वातद आंद. अदुनहाटीं मनम वरोंक-वरोर पावरम कियगोम. पावरम कियथना हरेक मनकल पेनदा संतानम आंदुर. ओर पेनदुन एरपाट कीतोर.

8 पेन पावरम आंद. अदुनहाटीं बोर अय्ते पेनदुन पावरम किय्योर, ओर पेनदुन एरपाट किय्योर.

9 दाना मरिनाहेंदाल मनाकु बस्केळ्ळक पिस्साना पिस्वर दोर्कना इंचि पेन दाना वरोंरे मरिन, इद दुनियाते लोहता. इल्हा पेन, मनापोर्रीटा दाना पावरमतुन मनाकु हुपिस्ता.

10 मनम पेनदुन पावरम कीतोम इंचि आयो, गानि पेने मनाकुन पावरम कीता. अदुनहाटींगे, पेन दाना मरिन मना पापाल्क मापि आयाना इंचि मोक्कु आयालय लोहता. इदे निजम पावरम आंद.

11 पावरमगल्लोरिता! पेन मनाकुन इच्चोन पावरम कीता अय्ते, मनमगुडा वरोंक-वरोर पावरम कियगोम.

12 पेनदुन बोर बस्केन ह्ळ्हा हिल्लुर. गानि मनम, वरोंक-वरोर पावरम कियानय्ते पेन मनालोप्पो मनंता आनि दाना पावरम मनालोप्पो पुरागा आंता.

13 इल्हा पेन मनालोप्पो मनंता, मनम पेनदा लोप्पो मनंतोम इंचि मनाकु एरपाट आंता. बारित्ते, पेन मनाकु दाना सतता आत्मातुन हीता.

14 दीन मनम हूळतोम आनि मनम दीना साक्सि मंतोम, मना पेन बाबल दुनियाता पापाल्क पायिचालय ओना मर्रिन लोहतोर.

15 बोरन्ना ओक्कला, येसुए पेनदा मर्रिं इंचि ओप्कुनानय्ते, पेन ओनालोप्पो निल्सि मनंता, ओर पेनदा लोप्पो निल्सि मनंतोर.

16 पेन माकुन पावरम कीता इंचि इंदके तेलिचकुलतोम. माकु दानपोर्रो विस्वासमगुडा मंता. पेन पावरम आंद. अदुनहाटीं बोर अय्ते पावरम कीतोर, ओर पेनदा लोप्पो मनंतोर, पेन ओनालोप्पो मनंता.

17 मनालोप्पो पेनदा पावरम पुरागा आंता. अदुनहाटीं पेन न्यायम कियाना रोजुने मनम वेरियाकॉटा मना परकोम. बारित्ते किरिस्तु मत्तापे, मनमगुडा इद दुनियाते पिस्सेक मंतोम.

18 पावरमते वॅरिं मन्नो. पुरागा आता पावरम, वॅरितुन पोळागोट्टंता. वॅरिं सिक्साक संबंदिस्तद आंद, अदुनहाटीं बोर अय्ते वेरियंतुरो, ओरगा इसॉटा पावरम पुरागा आयापर्रो.

19 मनम पावरम कीतोम, बारित्ते मुन्ने मनाकुन पेन पावरम कीता.

20 ओक्कला बोरन्ना, “नना पेनदुन पावरम कीतन,” इंचि वेहिचे, ओना दादन ह्यसाकॉटे, ओर आबद्दम मनकल आंदुर. बारित्ते ओर हूळना ओना दादाने ओर पावरम कियुवस्के, हूळवा पेनदुन ओर बल्हा पावरम किया परांतोर?

21 पेनदाहेंदाल मनाकु इदु आदेस दोर्कता.

बोर अय्ते पेनदुन पावरम कीतोर, ओर ओना दादानगुडा पावरम कियाना.

5

1 येसु, किरिस्तु आंदुर इंचि बोरय्ते विस्वास कीतोर, ओर पेनदा मर्रिं आंतोर आनि बोरय्ते पेनतोनि पावरम कीतोर, ओर दाना मर्रिनतोनि इंका पावरम कीतोर.

2 इल्हा मनम बस्के अय्ते पेनदुन पावरम कीतोम आनि दाना आदेसकुना परकारम ताकंतोम अय्ते, अस्के एरपाट कीतोम गदा मनम पेनदा मर्कुनतोनिगुडा पावरम कीतोम.

3 पेनदा आदेसकुना परकारम ताकते, दानतोनि पावरम कीतोम इंचि एरपाट आंता. दाना आदेसकु कटिनम (वसेम आयवसॉटव) हिल्लें.

4 बारित्ते बोरय्ते पेनदा मर्रिं आंतोर, ओर दुनियातुन गेल्संतोर आनि मना विस्वासमहेंदाले दुनियापोर्रो मनाकु गेल्लु दोर्कता.

5 येसु पेनदा मर्रिं इंचि बोरय्ते विस्वासम कीतोर, ओर दुनियापोर्रो गेल्संतोर.

6 मनागा एर आनि नेत्तुरतोनी वातोर, ओर येसु किरिस्तु आंदुर. सिराप एतोनि आयो, एर आनि नेत्तुरतोनी. आनि ओना साक्सि हियानद आत्मा आंदु. बारित्ते आत्मे सत्तेम आंदु.

7 साक्सि हियनोर मुव्वुर आंदुर.

8 आत्मा, एर आनि नेत्तुर आनि ईर मुव्वुरा साक्सि उंदे आंदु.

9 मनम मनकनाहेंदाल हीता साक्सितुन मानांचंतोम अय्ते, पेनदाहेंदाल हीता साक्सि बच्चोर पेद्दा. बद साक्सि अय्ते पेन तना मरिंना बारेमते हीता. अदे साक्सि पेनदा साक्सि आंदु.

10 बोरय्ते पेनदा मरिंनपोर्रो विस्वास ईरतोर, ओर ओनालोप्पो पेनदा साक्सितुन ईरतोर. पेन इत्ता पोल्लेनपोर्रो बोरय्ते विस्वास ईरतोर, ओर पेनदुन आबद्दम कीतोर. बारित्ते पेन तना मरिंना बारेमते हीता साक्सितुन ओर विस्वास किया हिल्लोर.

11 पेन मनाकु बस्केळक पिस्सना पिस्वर हीता, ई पिस्वर दाना मरिंनगा मंता. इदे पेनदा गवाइ आंदु.

12 बोरय्ते पेनदा मरिंन स्विंकार कीतोर, ओनाकु ई पिसवर दोर्कता गानि बोनगा अय्ते पेनदा मरिं हिल्लोर, ओनगा ई पिसवर हिल्ले.

इंदके हामुर हिल्वा पिस्वर मनद

13 पेनदापोर्रो विस्वास ईरनोरिता! बस्केळक पिस्सना पिस्वर मिहगा मंता. दीन मिमेटु एरपाट कीम्टु इंचि नना मीकु इव पोल्लें रासा मंतन.

14 मना पेन पोरो ईदु विस्वास मंता. मनमगिंटा दाना मनसु मत्ताप तल्कानय्ते अद मनद केंजंता.

15 आनि मनम बतलय्ते दान तल्कंतोम अद केंजंता, इदु मनाकु एरपाट मंता. दानहाटी मनम दान बतलय्ते तल्कंतोम, अव मनाकु दोर्कतां इदिका मनाकु एरपाट मंता.

16 ओक्कला मना दंटा विस्वासि हामुर हिल्वा पापम कियनेके हळानय्ते ओनाहाटी पारतना कियागोम. पेन ओना पापमताल पायिचंता. इत्ते बोरय्ते हामुरते होनानसोंटा पापम कीतोर ओनाहाटी आयो. इसोंटा पापमगुडा मनंता दाना परिनाम हामुरे. नना मीकुन इसोंटा पापमताहाटी पेनदुन तल्कागोम इंचेके हिल्ले.

17 अन्नि कराब कबाह्क पापमे आंदु. गानि अन्नि पापाल्क हामुरताहेके ओयों.

18 मनाकु एरपाट, बोरय्ते पेनदा मरिं आतोर, ओर पापम किय्योर. पेनदा मरिं ओना कापाळांतोर. आ देय्यम ओना बतल किया पर्रो.

19 मनाकु एरपाट मनम पेनदा हेंदोरम आंदुम. पूरा दुनिया आ देय्यम कयदे मंता.

20 गानि मनाकु एरपाट मंता, पेनदा मरि वासि, मनम निजम पेनदुन एरपाट कियागोम इंचि मनाकु तेल्वि हीतोर. बारित्ते मनम निजम पेनदुन एरपाट कियागोम इंचि. इत्ते, मनम पेनदा मरि येसु किरिस्तुनलोप्पो मंतोम. पेनबाबाले निजम पेन आंदुर आनि बस्केळ्ळक पिस्सना पिस्वर ओरे आंदुर.

21 पिलाल्कुनिटा! मिमेटु मूर्तिनाल लक्कु मंटु.

Pavitra Polle
Aheri Gondi: Besta Kabur (Bible)

copyright © 2020-2022 Wycliffe Bible Translators, Inc.

Language: (Aheri Gondi)

Contributor: Wycliffe Bible Translators, Inc.

All rights reserved.

2025-05-01

PDF generated using Haiola and XeLaTeX on 1 May 2025 from source files
dated 1 May 2025

856c9a76-2de1-5675-855a-28be9a349068